

Segun intuicion propio:

Nos comunidad no ta asocia desaparicion di Holloway cu crimen premedita

Ta di lamenta cu te ainda e actual gobierno, na porta di un contienda electoral, no ta actua manera si ta haci'e un gobierno responsable. Den

nan desespero y angustia pa busca votonan y sostenedornan... pa core campaña... ta purba busca ayudo den e sector cu ta

victima di nan mal maneho.

Ta tristo pa mira con p.e. un sector cu a wordo masacra cruelmente ta responsable pa carga un bandera, un sticker of cualkier material di propaganda politico, di e grupo tradicional cu a masacre. Ta tristo pa mira con den caya, den dia cla, un hende cu a wordo discrimina (y ta wordo ainda discrimina) of maltrata psicologicamente, ta coriendo campaña politico pa un grupo di abusadornan.

E victima (e "infiltrado" campañero ey) cu te ainda ta esun cu ta carga e sistema di esclavitud moderno, ta add'e un carga mas n'e peso gigantesco cu tin den su schouder: chip-labor, condicionnan malo di trabao, daño (extorsion), humiyacion, abuso. E areglo pa haci tal acto descabeya ey, ta pasobra e sostenedor tin mester di un documento of "pasaporte"? E areglo ey, ta pasobra e sostenedor tin mester p'e burocrata bin cla cu su documentonan cu tin derecho na dje? Un favor burocratico? Te na unda e tara di hende por yega?

Mi ta puntra, unda e hendenan of sostenedornan cu dignidad di e partido radicional ey a keda, pa lefende su supuesto principionan di fundacion partidario, ora nan ta acepta emehante insulto? No ta logico cu ora bo ta wordo insulta asina bo tin cu stop cu bo sosten?

E participacion den politica door di e victimanan di e gruponan abusador, mester wordo manifesta di un manera digno, y no basa den interes personal of chantahe di momento.

Den esaki e "realidad cosmopolita" cu Aruba tin (cu ta wordo mira solamente p'e hendenan sensato) ta hunga un rol importante. E participacion den politica ta un acto cu ningun persona of sistema por impedi. E politica ta inherente n'e naturaleza humano, ta nace cu e ser humano, tur hende ta politico. Asina ta.

Napoleon Bonaparte den pasado a yega di bisa: "e politica t'e unico profesion cu no tin mester di preparacion".

Bisa un hende, un luchador cu constantemente ta lucha p'e establecimiento di un

"husticia social" den e lugar unda e ta biba, pa no haci'e tal cosa; of bisa un hende pa no participa den politica, ta expresionnan di dictadornan of individuonan cu tin den nan sangre e tirania.

Ami ta un persona cu ta lucha p'e establecimiento di un berdadero husticia social na Aruba. Humildemente, ami ta un persona cu ta lucha na Defensa di e Derechonan Civil di nos tur ariba Aruba (Derechonan Humano), p'e respet n'e Dignidad di e Ser Humano, y ningun tirano por bin bisa'mi pa no facie tal cosa. Ta e amor p'e comunidad unda mi ta biba e motivo pa mi facie tal cosa. Ta e amor cu mi tin pa Aruba y e gran mayoria (si no ta tur) di e habitantenan e motivo pa mi ta den politica. Ningun insensato por bin bisami pa mi no ama of tin amor. "E amor ta un arma hopi

poderoso cu facilmente ta elimina un mente debil".

Ta e compromiso cu mi tin cu Aruba y cu tur hende ariba Aruba e motivo pa mi ta den politica, y mi ta spera cu e relacion cu mi tin cu un partido politico por ta un berdadero relacion y no un farsa, pasobra ami no ta un hipocrita, ni traidor.

Un luchador mi ta pasobra espiritu mi ta, y no simplemente un curpa. Door di esey, ningun hende of ser por impedi mi lucha, ya cu na Aruba ta necesario e establecimiento di un berdadero Husticia Social, un miho Calidad di Bida y un husto Distribucion di e Rikesa. Ta p'esey mi ta lucha. Dia 23 di September cu E Todopoderoso dilanti mi y nos tur, e resultado di parti di mi accion y deseonan politico ta bay wordo manifesta.

Tilio_Reategui@yahoo.com

Tilio Reategui:

Mi Lucha

ORANJESTAD (AAN) — DIARIO a acerca varios persona na Santa Cruz, San Nicolas y Playa pa puntra nan con nan ta mira e caso di desaparicion di e hobencita Nataliee Holloway.

Segun intuicion propio e caso no tin di haber cu crimen premedita, pasobra no tin motibo pa pensa riba un crimen pasional pasobra no ta asina cu e hoben tin un partner na Aruba como tampoco por pensa riba "atraco" riba e hoben, ya cu tur su pertenencianan a keda den su camber di hotel incluso passport y cent.

Como cu hopi di nos hendenan ta subi internet y te ainda no por a lesa nada cu ta papia contra e mucha su bon reputacion sino tur contrario, e escenarionan cu guia pa intuicion tin cerca e personanan aki ta:

1. Cu mucha a consumi alcohol di mas y cu esaki a hibe usa droga hunto cu esnan concerni (cu ainda en realidad no tin prueba contundente pa nos sa ken e, of kendenan por ta) y cu na dado momento el a haya un overdosis y a haya ataca, y cu esaki a spanta esnan cu tabata cune, y nan a dicidi di deshaci di e curpa.

E personanan cu ta conclui esaki nan punto di bista ta cu posiblemente esnan concerni lo a haya nan mes hinca den un problema grandi no solamente cu nan famia, pero cu henter Aruba, pasobra lo a sali na cla cu nan ta envolvi den consumo di droga y cu nan ta induci e mucha muher na usa droga, locual por ta relaciona cu trafico di esaki, y pa evita tur e situacion aki nan a deshaci di e curpa sin bida, pero cu e no a worde mata.

Hasta tin hende cu ta haya cu polis mester subi Cero di Hooiberg, pero nan no kier a

drenta den detaye riba e pakico.

2. Otronan nan intuicion ta bisa nan cu e mucha muher a worde saca for di Aruba, pasobra e tin problema of e tin problema cu su famia, of e mes kier a experiencia kico tin den mundo buscando su mesun alternativanan como mucha hoben, inteligente y bunita, pa sobrevivi.

Segun e personanan cu ta pensa asina aki, despues cu prensa Mericano bandona Aruba y cu tur cos bin bek na normalidad, nos lo haya sa cu e ta bibando sea na Europa of un pais Latino, pasobra nada ta keda secreto y un dia un hende lo identifica e hoben den otro pais.

3. E di e tres version mas scucha ta cu e mucha muher mes a mata su curpa, kizas bao influencia mes di alcohol of droga, y cu esaki lo a sosode den cercania mes di nos beachnan y cu su curpa lo worde haya y autopsia lo por mustra esaki.

4. Pa ultimo, tambe tin hende cu nan intuicion ta bisa nan cu e mucha muher ta bibo pero e ta scondi na Aruba mes, den algun chollerhouse pasobra e tin berguenza pa su hendenan haya sa cu el a bebe bay gol y cu e por a usa droga of worde droga, ya cu e ta pertenece na un ciudad apegada na un misa Cristian, ademas cu e tin hopi bon reputacion entre su hendenan na Birmingham. Aunke e pensamentonan ta diferente y cada ken su intuicion ta bisa otro, e sentimiento di impotencia di no por haci nada pa logra esclarece e caso, ta comun na e personanan aki y sigur na henter comunidad, y no tin un hende riba nos pida baranca cu no ta desea pa e episodio aki yega su fin, locual tanto ta desea esnan optimista como esnan pesimista.